

Tuesday, June 11, 2024

Time - 2:30pm - 2:35pm

AKASHVANI AIZAWL

REGIONAL NEWS UNIT

REGIONAL NEWS BULLETIN

GREEN MIZORAM DAY/GOVERNOR

Larsap Dr. Hari Babu Kambhampati chuan ramngaw chereu avanga chhiatna thleng mekah ramngaw humhalh pawimawh zia hriat thar a tul thu a sawi.

Vawiina Mizoram puma Green Mizoram Day hman meka hnatlanga a tel ve naah Larsap chuan ramngaw chereu nasa chak lutuk avanga sik leh sa danglam mekin chhiatna lian tak tak a thlen chhoh mekah khua leh tui ten ramngaw humhalh pawimawh zia leh, ramngaw siam tura tan lak a pawimawh zia hriat thar a tul a ni a ti a. Ramngaw chereu in a nghawng tuihna tlem tial tial te, khawlum leh nungcha a nghawng dan te hre tharin, a siamthat hna thawh kawngah khua leh tui ten mawphurhna an hriat thar leh a tul a ni a ti.

Larsap hi a nupui Dr Jayashree Kambhampati bakah Governor secretary leh official dangte pawhin Green Mizoram Day pual hian Raj Bhavan huam chhungah thing tiak chi hrang hrang an phun bawk a ni.

Vawiin ramngaw humhalhna puala Mizoram ni pawimawh Green Mizoram Day-ah hian Mizoram chhung district hrang hrangah hun hman a ni a, kumin thupuihah 'I nunna atan thing phun rawh' tih hman a ni.

Green Mizoram Day hi kum 1999 June ni 11 atang khan hman tan a ni a, chuta tang chuan kum tin June 11-ah hman chhunzawm zel a ni.

(DIPR)

<><><>

LADC BYE-ELECTION

Lai Autonomous District Council hnuai Village Council 99 inthlanna leh Lawngtlai Chandmary MDC bye-election atan June 27 khian mipui ten vote an thlak dawn.

Inthlan hun tur leh tul pawimawh dangte chu vawiin khan State Election Commission, Mizoram a Commissioner Pu Laima Chozah chuan DC Conference Hall, Lawngtlaiah a puang a. Inthlanna muanawm leh felfai a awmtheih nan inthlanna buaipuitu, Political Party te, Media, Tlawmngai pawl leh mipui tawiawmna a ngen a, mipui duhthlanna kaltlanga inrelbawlina tha tak a awm theih nan theihtawp chhuah theuh tura sawmin, tun thla ni 27-ah vote nei ten thlak vek turin a sawm bawk a ni.

LADC hnuai ah hian Village Council 99 awmin General Seat 496 awmin Hmeichhe tana seat hauh 99 nen Village Council Member 595 thlan chhuahtur a ni a. Lawngtlai Chandmary bial MDC Dr. Lorrain Lalpeklana Chinzah chu MLA a thlantlin a nih hnuah Chandmary bial hi a chhuahtur vanga By-election neih ngai a ni.

Village Council leh MDC By election atan hian chuhtumte tan tun thla ni 18 tlai dar 3 thleng hming a pekluh theih dawn a, hming pekluhthe chu ni 19 chawhnu dar 3 atangin endik a ni ang a.

Inhnukdawkh duh tan ni 21 chawhnu dar 1 thleng hun hawn a ni a, ni 27 zing dar 7 atanga tlai dar 5 inkarah mipui ten vote an thlak dawn a ni.

Inthlanthat ngai a awm chuan ni 28-ah inthlanthat a ni ang a, Village Council inthlanthat vote tlate chu vote thlak zawhah chhiar nghal tur niin, Lawngtlai Chandmary MDC bye-election a vote tlate chu thla thar ni 1-ah chhiar a ni thung ang.

Village Council inthlanthat ah hian Ballot paper hman a ni dawn a, Lawngtlai Chandmary MDC by election ah vote thlak nan Electronic Voting Machine hman a ni thung ang.

State Election Commissioner Pu Laima Chozah chuan inthlanthat hun puan a nih tak vangin LADC huamchhungah Model Code of Conduct hman tan nghal a nih thu a sawi a ni.

(Lalngtheta Ralte, Lawngtlai PTC)

<><><>

HEALTH MINISTER

Health Minister Pi Lalrinpui chuan Lunglei Civil Hospital tihchangtlun nana specialist dah leh ICU hman theih tura hmalak bakah Health Care lam pawh chak taka hmalak a nih tur thu a sawi.

He thu hi nimina Lunglei Sub-Headquarters YMA hruaitute a kawmnaah Minister chuan a sawi a. Lunglei Sub-Headquarters YMA hruaitute nena inkawmna hun tha an nei thei chu lawmawm a tih thu a sawi a. Lunglei YMA hruaitute a hnena thu pawimawh hrang hrang an thlen te leh chhim lam mipuite tana tul leh pawimawh an rel te chu a theih ang ang a bawhzui sak tur thu a sawi a. Kumin October thla-ah hla phuah lama hma sawn nan Lunglei-ah Music Festival buatsaih a nih tur thu a sawi bawh a ni.

Lunglei Sub-Headquarters YMA hruaitute ten Minister hnena thu an thlen zingah hian Lunglei chhuah lama kawng siam tura hmalak te, Mualthuam 'N'-a YMA Park project lian tham deuha hmalak te, YMA ram Pukpuia Youth Hostel sak dan ngaihtuah te, Kawrpui leh Khawthlangtuipui, Khojoisuri leh Malsori khua inkar buh bal thar nana ram tha tak chu Mizote chhawr theih tura sawrkarin a chei bawl rawtna te a ni a. Heng bakah hian Home Science zirna Lunglei College a dah te, Lunglei Town chungah Hydrant siam belh, mipui hman tura Hall lian tha neih leh ATL Road, Lunglei District chungah tih hmasawn te an thlen bawh a ni.

(DIPR)

<><><>

SCHOOL VOLUNTEER PROGRAMME AT MAMIT

Central YMA leh Samagra Shiksha Mizoram te'n Mizoram zirna hmasawna tur atana thawhhona tur MOU an lo ziah angin Mamit District-ah pawh Vidyanjali (School Volunteer Programme) chungchangah District Level Orientation Programme chu BRC Hall, Mamit-ah nimin khan hman a ni.

He hunah Mamit DEO Pu Laldingliana, Mamit Sub Hqrs. YMA President Pu Vanlalchhuanga Chhangte bakah Secretary Pu H. Lalnunfela te'n thu sawiin State

Level-a YMA leh Samagra Shiksha thawhona MOU chu theihtawpa tihhlawhtlin zel an tum thu leh, khawtlang mipuite nen zirna lama hmasawn tura tanrual a tul thu an sawi a.

Vidyanjali hi school mamawhte, a hmanrua emaw thil tihsak hmang emaw-a mipuiin an thawh theihna tur programme a ni a. Vidyanjali hlawhtlin theihna tura YMA leh Samagra Shiksha lam thawh dun dan tur ruahmanna duan lawk angte leh Vidyanjali Portal hman dan tur chipchiar takin Pu H. Lalrosanga, Dy. DPC & District Nodal Officer ni bawk chuan zirtirna a pe a. YMA-te nen thawhona tha leh midangte tana entawntlak taka ke pen ho zel a beisei thu a sawi bawk a ni.

He hunah hian Sub Hqrs.YMA hruaitute leh branch hrang hrang aṅangin mi 30 chuang an tel bakah biakhmuhtheihna kaltlangin District chhunga YMA Branch hrang hranga mi 42 te'n he programme hi an lo zawm bawk a ni.

(DIPR)

<><><>